

**Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allanngortinneqarneranik Inatsisartut inatsisissaattut siunnersuut.**

(Aningaasaqarnermut Naalakkersuisoq)

**Saqqummiussissut**

**Siullermeerneqarnera**

Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allannguutissaatut siunnersuut Naalakkersuisut sinnerlugit matumuuna saqqummi-uppara.

Pisortat innuttaasunut suliffeqarfinnullu assigiinngitsorpassuarnik pilersuillutillu sullissisuupput, soorlu innaallagiq, imeq, kiassarneq, ineqarneq, pujoorfinnik paaviaaneq, ulluunerani paaqqinnittarfiit il.il., akiligassiisarlutillu, soorluttaaq pisortat aamma akitsuutinik aalajangersimasunik assigiinngitsunik akiligassiisartut.

Pisassarisat ilarpassui piffissaagallartillugu akilerneqartanngimmata akiitsorineqartut tamar-miusut ingerlaavartumik amerliartorput.

Siunnersuutip siunertaraa pisortanut akiitsut amerliartornissaannik pinaveersaartitsinissaq. Akiitsut ilarpassui ataasiakkaarlutik annertigisassaangillat, ataatsimulli katillugit akiitsut aningaasarpassuupput. 2010-mi akiitsorineqartut katillutik 1.245 millioner kr.-it missinginik annertussuseqarput. Eqqakkanut tunngasuinnarmik akiligassatigut pisassarisat katillutik 15,5 millioner kr.-it missinginik annertussuseqarput, sulianut ingerlasunut 72.400-t missinginiittunut agguataagaallutik.

Pinngitsaaliissummik akiliisitsiniartarneq nukinnik annertoorejussuarnik atuiffiusarpoq, innuttaasumut pisortanullu. Pisortat akiitsut taama amerlatiginerisigut aningaasaannaat erniatigullu isertitassaannaat annaaneq ajorpaat, ilutigitilluguli pisortat aamma akiliutissanik akiliisitsiniarnermut nukippassuit atortarpaat. Nukiit siunertanut suliassanullu siunertaqarluarnerusunut atorneqartariaqaraluartut.

Siunnersuutikkut anguniarneqarpoq akiliisitsiniartarnermi suleriaatsit nukippassuarnik atuiffiusariaqartartut amerlassusiisa ikilisarneqarnissaat, ilaatigut ilanngartuisarneq pillugu aalajangersakkap aammattaaq soorlu kommunit ulluunerani paaqqinnittarfiutaannut angerlarsimaffinnilu paaqqinniffiutaannut akiliutissatigut pisassarisanut atuutsinneqalerneratigut, ilaatigullu aamma ingerlaannartumik akiliisarnissamik aaqquissuussinermut pinngitsoorani ilanngunnissamik piumasaaqateqarnikkut. Aammattaaq siunnersuutikkut periarfissinneqarpoq inuinnaat pi-

lersuisussaataanermt akilersuutitut akiligassanngoreersimagaluartunut pisassarisanik ilanngartuisinnaanissaat. Aammattaarlu siunnersuutikkut anguniarneqarpoq aningaasanik akiliinerup akiligassanut naammassissutaanissaanik pisortat itigartitsissuteqarsinnaanissaannik periarfissaq.

Ingerlaannartumik akiliisarnissamik aaqqissuussinerit aqutigalugit akiliisarnerup akiligassanik akilersuineq angusaqarfiunerulersillugulu pisariinnerulersissavaa, tassa innuttaasunut aamma pisortanut iluaqutaasumik.

Siunnersuutikkut anguniarneqarpoq inuit aamma inatsisitigut pisinnaatitaasut pisussaataasullu akiliisarnissaq pillugu aningaaserivimminnik isumaqatigiissusiornissamut periarfissallit, pisortanut akiligassaminnik ingerlaannartumik akiliisarnissamik aaqqissuussineq aqutigalugu akiliisalernissaat.

Naggataatigut inatsisissatut siunnersuut tassungalu oqaaseqaatit innersuussutigaaqka.

Taamatut oqaaseqarlunga siunnersuut Naalakkersuisut sinnerlugit Inatsisartunut suliassanngortippara, aammalu Akileraartarnermt Akitsuusiisarnermullu Ataatsimiititaliami suliarineqareerpat aappassaaniigassanngortillugu.